

余
山

山

集

龔山集序

關中李楷撰

桐城方子爾止之詩凡若干卷諸體咸具河濱子序之曰夫論詩而好譏議人者此其人不足與言詩也其意以爲不排人無以自見故於古人亦反唇焉繇此推之必律天下之人皆歸於已一軌凡古人之不合於我者輒訾其瑕類使聞者無不驚而畏之曰夫夫也且出古人上其誰敢與之爭嗟乎古人何易言也古之人先得我心亦猶我之先得乎天下後世之心也與我同者我趨之與彼同者彼趨之古今一揆是非無定必引彼以就我與強我以適彼皆不然之事也或彼或我自成一家而已矣乃世所援以爲口實者元輕白俗郊寒島瘦

予竊以爲不然夫微之樂天東野閬仙豈復有堪爲姍
笑之資哉後之學者不得其精神之所存而皮相之耳
食之羣而吠之以輕俗寒瘦槩古人之一生古之人其
心折乎若四公者皆自成一家者也夫家者異於遊歷
與寄寓者也跋涉之途不足以當一宿一宿之旅不足
以當流寓流寓之所不足以當故廬以是知岐出岐入
泛泛然而無所歸者皆失其家而家他人之家不能以
自立我之亞旅我之苗裔將安歸乎古人爲人之所歸
而或以其異已則曰非我家也然不謂之汝家乃遂訾
之曰此未足以爲家嘻其甚哉方子於詩無所不學而
歸宗無二其詩必自成一家故其言曰樸老真至詩之
則也予觀草木之華香艷沁人結而爲果堅確可舉方

子之詩詩之果也樸老真至則果之熟時也方子以僊
山名集本於離騷天問何娶彼僊山而通之於台桑蓋
僊山卽尚書之塗山也其地或云在會稽以在鍾離者
爲正方子之意遠矣方子名文字爾止又名一耒字明
農

僊山集序

李叔則序

同里八十老人姚康撰休那

謂詩文必窮而後工者大約取證汨羅杜陵諸君子顧
楚之爲國唐之爲天下當其時皆何如其窮豈獨一人
哉夫必窮其人而後工其詩文詩文可不設矣乃至窮
天下之人以工一人之詩文司命者之需於詩文又何
爲也世言不讀萬卷書不行萬里路讀不得杜詩政恐
讀萬卷書行萬里路而非身經一時之變者亦讀不得
杜詩自予經變以來舉頭向天不復知日月所在乃得
讀爾止詩老眼頓明蓋今之爾止昔之汨羅杜陵也非
三君子此三代者遂成黑暗地獄矣乃知窮天下之人
以工一人之詩文者爲一人之詩文成而天下始有所

托此司命者之微意也夫天下之內天下之外有大物焉以持之者理也而詩之需於此者獨少焉過不在理也如五穀之取精元化者不過一歲之滋而住世者賴之至五金八石之壽皆萬歲而或至殺人其德乃不逮一歲之穀過亦不在金石也砒霜之爲物也人食之死龍食之肥則砒亦不死之藥而食之死者其脾胃不龍若耳生民以來忠臣孝子之心何一不出於理忠臣孝子之言何一不歸於理愈理愈奇愈理愈韻理者詩家之大藥特非其人不得而用之忠臣孝子之制作固龍之脾胃也與嗟乎惟理之窮亦久矣有爾止詩而理得所托天下與托焉此天下甘爲爾止窮不怨也長沙之吊汨羅曰歷九州而相君兮何必懷此都也蓋自傷所

遭不逮汨羅顧使以賈生而當永嘉靖康時頗得作此
想否故非司命之大仁大忍以窮一人而因大窮天下
人尚足誤我賈生未可與讀騷矣况他人乎然則所謂
一時之變今用之者兩人可也作詩者用之爾止是也
讀詩者用之休那是也

金山全集編年目次

前集

自戊寅至丙申

卷一至卷二

五言古

卷三

七言古

卷四至卷五

五言律

卷六至卷九

七言律

卷十

五七言排律

卷十一

五言絕

卷十二

七言絕

續集

自丁酉至辛丑

北游草

丁酉戊戌

徐杭游草

己亥

魯游草

庚子

西江游草

辛丑

再續集

自壬寅至巳酉

卷一

五言古

卷二

七言古

卷三

五言律

卷四

七言律

卷五

五言排律五七言絕

金山集卷之一

集自丙子訖丁酉是冬北土諸詩載北游草後俱編入續集

皖桐方

文爾止著

壻繡水王

槩安節較

黃州王澤弘吳廬定

五言古體

秋夜飲顧與治齋中

丙子

英英天上雲皎皎雲間月清暉在山川流光及城闕南
皋有芳逕秋蘭應未歇各攜一尊酒相與坐林樾主賢
賓亦嘉高言隨風發白露變爲霜夜久濕羅襪不惜霜
露冷所患餅壺竭哀鴻從東來神思共飛越嗟予懷昔
遊逸氣凌溟渤歲月曾幾何劉蘇已奄忽劉同人蘇武子弊篋
保遺篇荒丘掩枯骨感此淚霑臆憂來不能抗朝爲美
少年暮已垂白髮懽樂須及時沽酒市肴核仰視明河

金上集
低恒星曙將沒織女不成章牽牛不服輓萬象均虛名
何爲自勉鰥願與同心人西山采薇蕨

李臨淮玄素招集松筠閣

丁丑

大經生秋雲流陰被芳甸之子蓄奇懷中宵肆良譙升
階秉華燭四座萃羣彥旨酒一以湑嘉魚一以薦琴箏
非昔響商羽因時變蓮閣有餘址貝葉存遺卷緬懷古
哲人芳薇幸未遠起步梧竹間微颺冷然善

玄素先公
有貝葉齋

青蓮閣諸集行世

石橋懷與治

昔年居南邨卜隣近君子春秋多晏閒朝暮承音旨三
日不相見形神网依止風人咏采葛誰能別離此今年
居北門相去八九里君子抱冲素往來艱步履我行遭

冠亂憂患在遷徙經旬甫一過言笑無片晷都門復戒
嚴黃昏斷行李所以夏徂秋勺酒未嘗醺衡門石橋畔
屋瓦蔓瓜藟橋上見明月橋下聞流水南村路何許睽
孤情尚爾况乃隔中州伊人渺江汜回首念昔游感嘆
不能已願爲雙鴻鵠比翼凌風起

雲間五子詩

戊寅

刪李雯一首

陳臥子子龍

大雅隕霜露周行蔽蕤蕤浩浩穹壤間誰秉達士模東
海產羣彥斯趾才不殊陳子特英勇揚鑣奮前驅惠心
燭千仞雄風扇八區仰視秋鴈翔俛掇春華敷左顧金
瑯玕右盼貂襜褕琢詞凌謝鮑吐畧師孫吳所願樹弘
業豈爲榮一軀盛年構仁主布武游天衢從政白雲曹

銜恩日南隅。題鳩未及鳴。護艸歛已枯。匍匐返中阿。聲詩播上都。名與五賢齊。千載信不渝。臥子觀政刑部作五賢詩謂王李七子五子皆官刑部也

彭燕又賓

時俗何工巧。改錯背繩墨。文區旣波詭。辭府亦雲慙。彭子懷古懽。眷言崇令德。馳情抗三代。弘覽包九域。倡言發新聲。標義遵往式。衆星光離離。共指勾陳側。長樂旣軒翥。時夏彝仲授長樂令惠州亦遐陟。陳臥子授惠州李傷彼寒泉井。過時人不食。行路或咨嗟。達士乃恬默。南方有奇鳥。丹丘歛羽翼。朝飲澧水泉。暮食梧桐實。應運翔中天。將以輝王國。當其未遇時。凡鳥豈能測。

徐闇公孚遠

閣公青雲器蟄伏東海濱神理何淵浩標持亦嶙峋博
覽崇漢魏纖辭鄙梁陳作賦擬三都著論侔過秦所務
在秋實不獨春華新俯仰千載間王綱頽復振祿食逾
千億誰是英雄人君懷經世畧白比管樂倫挾策不見
收壯志猶未申垂竿涉澱水長與鸞雀親六翮豈終鍛
行矣凌秋旻

朱宗遠灝

曉日游湖山輕烟動微吹黃浦湛清華機山藹蒼翠須
臾雷雨作天水相虧蔽上疑虎豹鳴下見蛟龍戲山川
富變化鍾靈詎一致雲間數君子文質頗相似宗遠何
獨奇流韻迴孤異杼柚象天工五采互交織厥文信奇
險厥人廼溫懿辭榮慕王霸干祿笑毛義家園蒔藥荷

石戶封薜荔有時拂絹素忘言寫高寄彷彿龍眠圖不
數輞川記內美何紛吾令余發長喟

單質生見訪僧舍并惠三忠集畲此

高樹引秋蟬空梁逝春燕昨宵微雨集重陰滿僧院之
子一來過羈人共談讌秀采本淪漪腴詞復菁蒨內秉
金石姿匪直情婉變稽古式芳躅懷忠耿遐眷下上漢
宋書獨愴武侯傳煩冤痛鵬舉軾軻欽履善流覽未及
終風徽宛可見汨余有同心參差淚如霰
文信公也鵬舉鄂王字履善信公字
三忠蓋諸葛武侯岳鄂王

畱別楊愛生兄弟

新秋游雲間載啟楊子闌
時尊人龍友爲華亭廣文楊子邈何之白
下仍未歸琴書雖寂寞舍館含清暉仲子出迎客芬馨

襲人衣徜徉梧竹下魚鳥皆忘機伯子從吳來停橈卽
開扉金罍貯名酒玉軫揚高輝一杯彈一曲所願無乖
違如何舍茲去刷羽西南飛江南雜秋樹遠望帆影微
相送徒悠悠相思乃依依安得費長房以解長渴饑

送萬茂先應徵北上

之子遊白門僦居近長干臥病罕酬酢戶外秋陰寒我
來自吳會芳艸露已漙一揖未及終沃若平生懽同心
指松柏高言洽芝蘭惠我瑤華篇佐以青琅玕感茲意
纏綿盛之雙玉盤所恨舊京廣敞廬偏西安

子居西
安門道

里何阻修來往徒步難揚鞭日一過話言傾肺肝薄暮
催歸去中宵起浩歎雞籠山崢嶸秦淮水瀾漫商飈降
園囿柔條坐催殘燕鴻相背飛各自振羽翰我行歸故

鄉扁舟發江湍君行應明詔驅車渡桑乾執手莫能別

含情多悲酸仰視天宇空客星光桓桓聖人勞寤寐張

羅五雲端莘野釋耒耜溪揮釣竿之子起南州善類

鮮不歡陳君既叱馭

將士業已授晉州

劉子亦彈冠

伯宗亦將成途沈

生三上書至言道不刊執政雖未收高風激頽瀾

勅時相思者不合封入

我觀今日勢危殆如累丸寇盜盈中州戎

馬驕三韓旱澇復頻仍民力業已殫子成萬言策炯炯

一心丹須臾奏承明崇班入鵷鸞罩罩歌嘉魚坎坎咏

伐檀錫爾一命榮慎勿卑小官丈夫志功名尺寸亦可

觀何爲守章句盛年栖考槃行矣促蒲輪前途願加餐

病中東錢吉士

已卯

夙齡抱微尚思君良有年吳門竿觴詠白下曠舟旋山

川修且阻中懷鬱不宣三復蒹葭詩悵悵誰爲傳
伯宗游虎丘尺書因風發君復游嘉禾雙魚冷秋月思
情日已深音問日已闕三年不相見微衷詎能竭
憶昔城南寺道體方違和杜門謝車馬不敢頻相過今
茲來長干我病且奈何撫枕長歎息仰天發浩歌

送王幼公之毘陵

商飈振林薄脫葉盈江濬衆艸旣衰歇鷄雞復鳴悲東
家娶新婦西家守空帷物候本不殊苦樂各異宜憶昔
故鄉日與君讀書時共秉珪璋器各挺龍鳳姿同堂屬
高文連牀和新詩疑義每交質懽情兩不疑有時涉江
湖筆研長相隨雨花秋月冷九子春雲垂蹉跎十四年
出處何曾離今年齊射策言論爭瑰奇爾獨奮六翮高

舉翔雲達夙好二三子飜蜚亦參差我命何坎坷鍛羽
歸山陂席門掩窮巷殘花綻疎籬飲酒不成醉仰天長
嗟咨達人慕功名富貴安爾爲所恨歲月逝懷抱不得
施今爾揚輕舟毘陵省其師不忘攜手好殷勤就我辭
何以贈君言古道永相持君家喪亂後寄食縱水涯上
有白髮親下有無母兒行矣勿久淹繁華是歸期

獨酌東戴敬夫

秋陰三五日積雨迷荒苔我旣不得出故人亦不來午
餘少明霽悵望登高臺楊柳亦已萎梧桐亦已摧雲天
杳漫漫漸聞鴻雁哀感此蕭瑟情懷抱爲誰開呼兒貰
村酒頽然進一杯痛惜少年時去者不復廻海宇近多
故君相求異材天地本無私何獨窮我哉

容城答鄭魯若兼寄沈睂生

庚辰

春陰亘宵旦雨霰盈荒城旅次寡良仇中懷闕歡情出門邁之子攬衣道平生煦氣轉林柯好鳥時復鳴清谿昔遊燕歲星今幾度駑馬旣偃蹇美人亦遲暮修名恐不立壯顏未能駐顧盼二三子比翼翔天路鳳興憩蘭若惠我金石辭英義揚古華密情麗繁枝撫賤足永嘆告勞益深悲獻歲征途間役役何所爲卓爾敬亭友盛年樂高蹈軒服脫若遺丘園從厥好風規本遐舉學積更淵浩何以寄相思因君寫懷抱

送姜如農明府擢儀部

門有車馬客駕言還帝鄉逸翮順天風逍遙東北翔昔爲眞州宰墨綬垂芬芳報政逾十年今聞昭四方群公

命上集
極推轂玄幣爭相將側耳聲離離高鳴梧桐岡如何循
階序始拜春官郎聞者或歎息行道亦慨慷達人廼冲
恬謙讓猶未遑此意亦何深此器安可量容臺備禮樂
萬古生輝光我有姊氏吳苦節凜冰霜幽居四十載郡
邑多褒揚直指采其風將以告明堂聖朝重廉節闡幽
無遐荒所賴大君子惻然沛天章匪直爲匹婦實乃扶
頽綱恩波潤金石沒齒無相忘

秋浦感懷呈劉伯宗

辛巳

桐山麗江北江南卽池陽相去不百里一葦輕可航憶
我昔遊此覆額髮始長雖抱固陋質才思殊清揚執鞭
事君子日月分餘光器我以瑚璉贈我以珠璫自許天
路近逸足當騰驤奈何命不尤膂力忽已剛蹉跎至三

十尚困諸生場形容就枯槁意氣亦頽唐况乃逢世亂
流離客他鄉蜉蝣笑蛟龍斥鷃欺鳳凰俛首對少年惻
惻心暗傷君子懷古義繾綣情弗忘中夜聞我至叩門
訊行裝佇立風露下屏營訴穹蒼佳會卜良辰衆嫖升
高堂華筵具珍膳桂酒泛金觴吳姬兼楚女臨軒奏笙
簧始歌猶艷曲曲終發清商悲聲四野起寒風薄衣裳
秉燭歸館舍悵然著斯章

畱別吳尚乾

君自湘東來我向淮西去停舟立柴門垂楊亂春絮我
自淮西歸君復向江北駐馬入空齋楓林變秋色孟冬
江北還我又歸桐山相思日以篤相見何其艱當代論
交情如君能有幾安能久別離蹠蹠溝頭水丈夫本貧

賤况值凶荒年謀食走四方同病交相憐今朝始傾蓋
驚嘆顏色改白門且暫休勿遽歸東海况乃春氣至梅
花遍江南雙擁大小婦醉臥烏龍潭

題韓孟小母氏卷

我友韓伯子天懷本淵懿事親以孝聞宗黨稱其義一
日縞衣冠向予發長喟爲言母氏賢士女德皆備可以
式宗國匪獨表中饋厥考君孺公少有鴻鵠志讀書諳
兵法多勇復多智慨慷思奮身提戈出邊地欲繫單口
頸或笞中行背勲名著竹帛通侯取如寄可憐數不偶
蹉跎老將至困頓丘壑中霜刃不得試母氏結同心黽
勉襄所事授書教令嗣蔚爲圭璋器祿養方有期一朝
先見棄飲恨終昊天徽音畧可記椎牛勿復言懷橘將

安遣感此傷中情潺湲涕霑袂

襖日與蔡芹谿同舟作

壬午

穀旦屬元巳春雲澹天宇揚舲自石頭須臾達牛渚好
風雖云樂未若同心侶提壺向江市年荒乏清醕歸來
掩衾臥切切共私語中宵四鄰靜北風灑微雨借問敬
亭山相去復幾許良朋咸在茲先期命鷄黍山川尚靈
異交情貴爾汝苟能偕所歡焉知困羈旅

梅朗三招同劉長倩龔孟章集天逸閣

故人有高閣乃在宛水東逶迤三重階四眺環菁葱厥
名曰天逸弗與人情同借問誰構此前賢禹金公一室
抱遐尚萬里揚清風文孫紹丕業束髮居其中讀書三
十乘篇翰靡不通摘藻發春華流光奮秋鴻制作日以

富譽望日以隆有客南都來執契求良工握手道古歡
嘉言愜深衷置酒此高閣羣花發幽叢微醺立池上仰
視天宇空烈士丁盛年焉能守困窮努力樹修名千載
要所終

王抑之招集齋中有贈

東風扇繁囿羣芳粲朱紫豈無桃李花所佩在蘭芷宛
陵富英彥我愛王叔子秀質本天人孤標特清峙觀書
式前哲高文蘊遙指神交歷三歲把臂自今始艸堂招
我入酌酒多且旨翠幙出朱顏清謳發皓齒中宵風雨
集痛飲弗能止振衣起長嘆慷慨寧在此世路旣波靡
文區亦雲詭多君懷古歡出門遽知己我雖長賤貧未
敢愆素履勉勉崇令德相期麗青史

湯君謨讀書敬亭寄此

美人抱幽質索居敬亭隈
瑤琴向雲展錦字臨花裁
十日不一出巖戶封蒼苔
前夕與我約月明登茲臺
蟾兔忽已缺軒車猶未來
相思盼雲鳥悵望心悠哉
紈扇動涼颼絺衣生浮埃
何時就清盥一洗煩襟開

送劉孔安北上

萊蕪甌中塵粟里花下辭
古道諒匪遙高風在今茲
劉公挺奇節矯矯松栢姿
出宰兩巖邑弘譽東西馳
傲吏忽解綬家無百金貲
妻子不能飽脫粟手自治
散步衡宇下逍遙詠新詩
大雲起幽壑徵車來何遲
主聖相且賢古纁降茅茨
貞士本懷恩微官詎能辭
天路翔羽儀華勲及良時

送三兄仁植先生應召北上

東方天未明仰首盼辰極燭燭三能光左右勾陳側行人夜中飯宵征自努力豈不憚遠途將以匡王國昔擁湘南節勲伐垂峴山讒人交間之天路罹百艱荃始察中情錫以雙玉環歷陛敷弘謨穆穆開睿顏朝發爪步渚暮宿維揚城舍舟命車馬遙遙抗前旌公孤虛左席焉能緩王程可憐人異雁不及同飛鳴衆芳競春華寒菊晚始秀受氣本不殊華滋有先後良人苟寥采雖晚亦何咎但恐隨秋艸寂寞委園囿

送侯赤社北歸

赤社家商丘是年寇陷避地于越

有鳥東南飛千里以邀遊因風止江介毛羽何修修顧念平生巢摧頽委荒丘三日不得食能無稻粱謀延頸

望八方鳴鳳居上頭行行與之會逸響聞中州我欲從此鳥惜哉非匹儔徬徨岐路側日暮生煩憂

吳靜腑招同黎美周侯赤社康小范邵思遠胡豹

生諸子燕集

時令嗣舉于鄉

玄鶴在九臯弗與雞鷺羣有子相和之厥聲天下聞毛羽煥艸澤逸翮升層雲後先雖不齊顯晦終詎分憶昔上君堂江華歲方早別去十二年相逢顏色稿門巷許重過森森秀瑤草榮名何足侈介福以爲寶

嚴子餐招同王宇安暨令嗣茂遠朱岷左吳岱觀
夜集有懷亡友子岸

凜凜歲云暮北風淒以陰萬物各有歸而我獨滯淫美人懷古處嘉招入中林舉觴命親串有酒當酌斟同堂

皆素懷良會匪自今遐矚寫幽抱高言流好音君家令
兄弟川岳齊高深梁木早見摧惻焉傷我心思欲追遺
響托之于瑤琴琴與人俱亡涕下誰能禁

贈張長仁職方

癸未

長仁選明詩

君產南海濱我家在東吳山川阻修轂望望天一隅何
期飄蕩間所願與會俱片言當心曲金石良不渝采風
志明盛雅音來八區顧我本弱質焉能窺哲符石亦可
爲錯螭亦可爲姝永懷知己恩忼然中自虞

贈姚有僕進士

矗彼秦望山乃在東海邊山勢鬱且奇文木托其巔上
枝拂垂雲下根入重泉本爲明堂用一室寧足賢匠石
貢其材直至君相前巍巍巨麗觀可支大廈顛古人懷

所思欣慕爲執鞭汨予幸同時馳情麗雲天願君察識
此中道勿棄捐何以致殷勤布茲文本篇

宿何輶亦齋頭兼贈令嗣以燕

君家南山下門外江水清南山動微和江水湛虛明我
來就君宿不厭雞黍情登樓恣遐眺梅柳抽羣英五子
皆鳳雛長者六翮成臨流鑒毛羽文采列星晶延頸望
天風將飛遊上京亦有脩脩翼顧盼失平生

贈顧匠先兄弟

矯矯雙黃鵠萬里翔雲達當其戲沙渚雞鶩亦見欺顧
生年二十盼踈多光儀束髮受三禮文辭何瑰奇令弟
亦懷瑜出入肩相隨偶然度湖水羣梟肆倡披毛羽雖
見摧昭質焉能虧爲我語顧生富貴各有期努力及明

時高門益華棖丈夫志四海間并安爾爲

無題

夾巷何逶迤層樓亦嵯峨樓上有好女自名爲女蘿女
蘿本柔條托根松栢柯其性喜纏綿斯意良足多有客
江上來停車此經過目挑復心與徘徊立城阿要我入
曲房臨軒寫雙蛾中廚辦珍膳一飲朱顏酡問客何時
歸陽春待微和悵然惜分手歡聲變悲歌感此未別情
別後將如何

宋遺民詠

甲申

有序

程篁墩先生作宋遺民錄於萬曆初年是時海
內全盛人爭趨朝而先生卽興懷遺民亦奇矣
崇禎甲申之變從古所無士生其時者悲痛欲

絕甘心隱遯不復萌仕進之念因取宋遺民而
詠之第先生所錄僅十一人以予所聞則有趙
子固吳子昭劉會孟黃東發其他尚不止此姑
就所知十五人各系一章亦可以知予志之所
在矣

唐玉潛珏

會稽人

宋祖受周禪仁厚世相承國亡非失德運去良可矜胡
天降酷罰妖髡掘諸陵玉柙委荆棘珠襦棄溝塍唐生
一寒士感此痛不勝傾家結少年忠憤人人能夜竊其
骨歸石函抵金滕葬之蘭亭山種樹表升恒義聲日漸
著遂爲神祖憑假手袁治中家道勃焉興買田與娶婦
胤繁壽亦增斯人何所求天道庶有徵

張毅父千載

廬陵人

毅父山澤臞文公同邑友當公貴顯時屢辟辭弗受及其被拘繫扁舟過江口慨然請偕行捍衛如兩手餽舍近囚所時時進脯糗三年如一日勞瘁不言久先期製木櫬臨難函公首已又收公骸肩荷向南走歸葬父母邦此心始無負友道今凌厓盛事垂不朽

王鼎翁炎午

廬陵人

文公忠宋心皜皜如白日鼎翁者誰子猶未信其實彼非不信公愛之惟恐失創爲生祭文辭義何凜凜異公一見之奮迅就斧鑕公實未嘗見任運閉幽室百鍊終不柔三年願始畢生死豈由人祭者覺無術梅邊人自豪雄文亦罕匹尚有吾汶蘂恨未見全帙

謝皋羽綸

建寧人

皋羽故素封破家爲勤王曾叅文相軍合力奮戎行皇
天不我祐文輒謝竄亡流離閩越間久乃至浦陽浦陽
方韶卿言潔而行芳皋羽依之居倡和多篇章玄冬至
嚴瀨上有西臺荒設位臺東隅慟哭裂中腸擊石爲楚
歌竹石俱損傷作記多隱語祇欲名山藏豈知晞髮集
日月爭光芒

方韶卿鳳

浦江人

浦江有著姓實爲玄英孫高風被婺睦復有韶卿存在
宋本未仕切切懷宋恩隱居仙華山讀書蒼松根交游
有吳謝節義相與敦謝死無所歸痛如親弟昆葬之乃
祖側歲時薦蘋蘩行年八十二此志不少緩存雅故有

集遺詩數千言惜子未及睹他年訪其門

吳子善思齊

永康人

贊府雖小官忼直忤時貴性復好施予其家日窮匱飢
餓常經旬絕無仕進意晚乃得聾疾甘爲人所棄結交
惟方鳳謝翱亦同志三人遊山澤歌哭有奇致仙華古
石巖隱隱見題字及觀侯命錄壽天果不二

鄭所南思肖

連江人

憶翁客吳門年齒未衰暮祗因傷故墟終身遂不娶有
田施諸僧梵剎悉吾寓坐且不嚮北北人焉肯晤寄興
或寫蘭耻作泉石具吐詞惟痛快忌諱所不顧當時文
網密肝胆向誰訴其書曰心史鎔鐵以爲銅沉之枯井
中三百年始露出世曾幾時朔風又如故顯者忌其言

高人益欽慕金石有銷沉此書終不蠹

梁隆吉棟

鄂州人

梁公宋進士隱居大茅峯感時好吟詠秀拔如貞松曾作茅峯詩中有雙飛龍醉題僧屏展宵小妒弗容指其誹謗罪將以血釁鐘捕逮至燕獄穴屏而相從縲紲凡數年幸脫歸爲農晚歲寓金陵嬉游信孤筇詩律益悲壯逾爲人所宗死葬石城南至今仰高蹤

龔聖予開

山陽人

文陸二先生忠烈震華夏當時賣國人尚有訾之者龔生奮直筆作傳告天下序事最分明况復文詞雅往來吳越間傷心舊宗社其詩凄以悲繪事亦瀟灑同時有龔璠其名與君亞人比漢兩龔尤珍聖予馬

汪大有元量

錢塘人

大有一琴士曾被宋主知三宮既北遷侍衛同驅馳丞相在獄日抱琴一訪之文山感其義爲題水雲詩幸不死沙漠惆悵南歸時尚餘舊宮人相送出城來援琴一再鼓胡馬皆鳴悲所以謝皋羽譜作江南詞

林景曦德陽

溫州人

拾骨玉潛事或傳爲霽山當時有同心未必遽相關辱身爲丐者持筐故陵間遇物卽掇取俗人豈防閑猶恐蹤跡露鑄金賂諸奸遂得高孝骨昏夜負之還蘭亭種冬青其事凡兩見夢中詩四首亦載唐君傳莫知誰作者大抵皆奇彥我觀白石集風雅窮正變其中贈唐作冬青在所羨前詩似景曦特爲玉潛撰

趙子固孟堅

吳人

子固與子昂俱爲趙氏孤才智亦相若品格何其殊厥兄隱水國從不履闔閭縣令往見之飛棹入菰蒲可望不可卽展矣朱鳳雛令弟吳興來拒之錠門樞阿嫂啟後戶一揖坐須臾開口問茗溪勿使溪水滂子昂慙而退呼童洗坐隅惟恐有腥穢辱我青氍毹嗟彼承旨者失身亦何愚

吳子昭震

吳人

子昭生元初宋亡二十載秉性不肯仕甘心蹈東海是時草莽間尚有遺黎在君從問往事記述若有待錢塘宋故都每歲遊者再徘徊舊宮闕欷歔發長慨尤喜詩與歌聲出似天籟時人罕得聞所狎樵牧輩天運苟不

回老死復何悔

劉會孟辰翁

廬陵人

涇溪以諸生廷對忤似道羣薦不入官丘園從所好讀書深山中詩史靡不較酷嗜九種書丹鉛得其要當時富貴人落落罕同調惟有文與江二相通懷抱厥子曰尚友文筆亦奇奧父子擅作述砥礪在忠孝宋史逸其名何以闡高蹈

黃東發震

郵人

幼讀諸儒書黃氏有日抄經史頗淹貫事理能并包傷哉孔孟徒生於宋元交釋褐爲循吏掛冠隱山均紀年曰咸淳弗以至正淆同時吳許輩其器豈斗筭儒術各有得祿位誰能拋辟如楊子雲終難解客嘲

石臼湖訪邢孟貞

鼎湖雷電合龍馭奄上賓率土皆怨痛况乃忠孝臣之
子秉至性聞變號蒼旻胡天降百殃覆用亡其親君親
理則一孺慕情尤真我來唁君喪直至湖水濱生芻聊
以薦薤露不敢陳上壽逾七十有子賢且仁牖下獲考
終曷爲苦悲辛大孝不毀性所願珍爾身

邢韓並巨室累世湖上居聚族各千百比屋成村墟風
俗旣淳美山川亦蕭疎永無兵寇患尚有唐宋廬我昔
與君約隱茲結機漁矧今逢世亂出門行趑趄徙宅傍
故人嘉木蔭有餘僦田種禾豆乞圃蒔瓜蔬可以長子
孫還能教詩書晨夕樂相過知君無棄子

送馮躋仲歸慈谿

世亂如洪波濟川在舟楫苟非風雲會敬身勿輕涉譬
如窈窕女蠶桑本素業寧爲貧人妻勿作富人妾爲妾
易捐棄中情常怵怯不如待六禮糟糠永相協感此寶
幽貞無爲傷并泐

潤州訪楊龍友兵憲

乙酉

南都富佳麗東風扇和柔萬物各有適吾生獨懷憂撫
牀不能寐振衣起行游行游欲何之美人在芳洲浩浩
長江水三山峙中流持節整王師恩威播遐陬夙昔渥
君澤頂踵亦已周所媿細微質弘施詎能酬太湖有笠
澤蒹葭廣以脩其中隱君子招我爲匹儔野性本麋鹿
樂此將歸休揚舫入京口徘徊一停舟丈夫感知已干
祿道所羞勿謂隨陽鳥區區稻粱謀

三月十九日作

時在京口與邢昺史古潘陸錢邦寅范景仁登北固山拜哭

烈風吹黃沙白日黯無光
江水聲震蕩草木零芬芳
莫春景物佳何爲倏悲涼
痛哉今日月我后罹厥殃
天人有同心終古猶靈傷
一從神京沒河北非我疆
龍種陷荆棘未審存與亡
羣盜匿函谷頃復奔湖湘
王師豈不多疇能奮戎行
小臣本微細憤懣結中腸
陟彼西山顛涕泗瞻北荒
奄忽歲已周哀情若新喪
寄言百君子舊恩安可忘
茲辰易文繡縞冠白衣裳
北向一稽首臣庶義所當
曷忍處華屋對酒鳴笙簧

從吳錦雯讀宋玉叔詩喜而有寄

有客新亭來示我白紵扇
其上放歌行高文一何絢
借問誰作者江南罕茲彥
山東宋叔子稽古破萬卷
英聲

震金石雄風走雷電厥昆並人傑義旗舉鄉縣孤軍克
羣盜一身經百戰斯世求異才伊人尚微賤惆悵掩尊
酒何時共權譙

丹陽道中懷古

范公古豪賢曾涉丹陽路停舟一登岸偶與石生遇爲
言身困窮衣食罕所措二親在淺土欲葬乃無具執手
聞斯言惻然動情懷有麥五百斛可以爲君贖子身還
東雒趨庭道其故父子復同心輕施諒不悞斯人悵已
矣千秋耿遐慕

贈趙止安先生

丙戌

毘陵昔多賢近代有其二一爲孫文介一爲張清惠高
風扇區宇頽波激標季我生雖同時幼小不及事今年

過仁里二公皆已逝九原不可作臨河發長喟繼起有
趙子禔躬亦純粹遵路步前哲嘉脩果無愧釋褐將十
載蕭然類寒士僦居城東隅疎林面荒寺葵藿常弗飽
焉能免僕悴有客上君堂心言不遐棄共秉松栢姿各
懷金石義舉世雖沉冥斯人無改易黽勉崇令德白首
應不替他時吊古者張孫同傳記

白下移居

丁亥

城南有荒寺云是古瓦官傑閣雖凌厓香林未凋殘我
性本孤癖憩此中心歡山僧敬愛客假寓良非難一室
容偃臥三時恣盤桓讀書有真樂不畏飢與寒隣人售
餘屋移家此偷安風雲苟未會且作龍蛇蟠

隣園有嘉樹密葉何青青厥名女貞實移植吾中庭春

夏旣滋茂秋冬亦不零結實貫氷霜纍纍若繁星采之
蕓清酒可以延頽齡

方池竹籬外我欲種芙蕖家人不好潔往往畜鷄豬白
水徒溷濁芳園少糞除人生同逆旅天地亦遽廬室家
何足道且還玩詩書今夕爲我室明旦他人居易不歸
湖山徜徉任樸漁

久不得子畱消息

戊子

仲夏湖上別相期晤秋初豈知去海東滯淫一載餘嘉
會旣已艱好音亦復疎引領望雲樹安能免欸欸嗟爾
有頑父所志在簪裾千秋萬歲名棄之如敝苴用此爾
失歡不得歸里閭自昔與我約南山可結廬秉耒學躬
耕願爲桀與沮獨少買山錢此意竟趑趄游魚懷舊淵

飛鳥戀故墟終當諸所願白首共菑畲

麻城贈枯木大師四十八韻

富貴人所欲今人亦何偏自少至於老無時無糾纏聲
色好美麗飲食求甘鮮宮室喜丹雘車馬爭肥堅獲什
必覲伯獲伯必覲千獲千必覲萬百萬猶歔然所以終
其身困憊無息肩名節亦可毀軀命亦可捐廉耻道盡
喪所嗜惟茆茆末俗有通病盧扁難以痊達人非猶龍
鳥能拔重泉吁嗟槁大師所謂真豪賢師本貴公子家
世甲湘川弱冠富文采風流復翩翩才名馳海內震動
三十年注官執金吾出入禁掖前居然不屑顧逸氣凌
蒼旻平生好遊俠賓客嘗滿筵摘詞進吳越擊劍來幽
燕一贈輒千金一飲動萬錢有時涉江湖桂楫沙棠船

有時歸里舍寶馬珊瑚鞭良疇被原野廣廈通市塵歌舞
克後房諸姬鬪芳妍及時共娛樂寧復知憂怕一朝
邁世變陵谷倏以遷師乃抱大痛祝髮逃諸禪他人逃
禪者尚不屏世緣師於一切累曠然無拘牽有子繼五
齡秀惠誕自天厥母年始笄嬌弱尤可憐繼室亦蘭茂
嗣君復珠圓師悉不介意棄之如浮烟有田八百頃百
頃遺乃傳其餘散宗族以半爲佛田世間慳吝者視此
奚天淵師晤懺悔理自陳昔多愆從此習苦作不令體
柔便一笠一蒲團行脚荒江邊晝則倚樹立夜則枕石
眠肘見知衲破踵決知菲穿飢時向孤村持鉢乞粥餽
嚙爾色不忤呵之貌益虔我問師名字師默不肯宣浮
雲翔野雀高樹鳴秋蟬吾從出家後名字遂忘焉傍有

識之者此是梅惠連

小孤山詩

我祖斷事公諱法字伯通建文朝舉于鄉授四川按察司斷事靖難兵取南京

天下篇集官皆有賀表公不肯與名被逮至望江給守者曰此吾父母邦也幸寬我械容治酒北向而拜以盡人子之思守者許之于是衣冠立船首拜拜畢躍入江而死妣鄭孺人會赦歸苦節四十年懷其爪髮葬于東麓瞻山今戊子七月八世孫文自楚歸過望江欲獻憑吊求我祖所沉之處不可得因見小孤危峯崢嶸莫可攀躋忠義之薨當萃于此故作小孤山詩

高皇造區夏大寶遺冢嗣成祖本燕王智勇奪神器四海義不服爭欲殉所事方黃及齊練皎皎著天地我祖山澤民嗣君舉鄉試厥師卽正學風節夙相勵不敢卑小官攜家走荒裔干職何重輕矢心必無二是時盛誅戮忠臣無噍類我祖不動心恬然就拘繫舟行至望江左徒入夢寐乞拜先人隴少展游子意衣冠立船首拜

罷發長喟舉身躍洪波竟逐彭咸逝有司憐其忠妻子
幸免議狼狽歸故山爪髮同坎瘞厥後二百載子孫亦
昌熾嗟哉遜國時風尚惟名義真人本同出門內相吞
噬臣僕非二姓九死猶未悔何況□□分禮樂悉淪棄
我祖設在今悲憤復何似浩浩長江水小孤山獨異巉
巖如其人靈爽此高寄後死者誰子祖風得無愧

寄酬李溉林明府

南方有佳人卜居在秋壑白日長苦飢上山採薇藿當
其年少時顏色桃花若隣里爭相求不肯苟然諾欲擇
千古士始遂百年約以此竟蹉跎歲月忽已索况遭兵
火亂家室盜所掠流離山谷間依人習耕作誓以處子
終不復通媒妁使君東方來光輝燦城郭遣使與之言

願得克帷幕爲我謝使君此意諒不薄顧我非盛年容
華久凋落君卽不我棄寧無白愧作日暮下山路西風
吹敗籜不及雙飛燕銜泥巢君閣

石臼湖贈邢孟貞兄弟

巳丑

春郊偶一出十日猶未還曖曖湖上村漠漠湖中山臨
水百餘家一姓居其間其間隱君子與我情相關茅堂
治雞黍各言良晤艱願爲平原飲此興殊不慳試觀名
利客汲汲多愁顏誰能脫塵務如我數人間

邢孟貞復去白門予送之郊外賦此

人生如枯蓬飄飄隨風沙朝猶同一隅夕乃在天涯臨
別不忍發握手長吁嗟君髣已成雪我髮亦將華俱非
少壯年安得久無家仰視浮雲陰白日忽西斜徘徊岐

路間飛飛羨歸鴉

贈林殿闕

我來姑孰城側身寄蕭寺密竹當窗牖霜風動寒吹有
客在比隣閉門人罕至中夜激高歌商聲滿天地借問
歌者誰四明林給事給事先朝彥崢嶸公輔器世變遭
坎坷零落東海裔我雖面未覲十載有神契知爾懷舊
恩蹇蹇王臣義嘗以金石心發爲琅玕字梁姜及陳宮
四子乃同志哀吟互相荅古歡庶無愧今我一讀之泫
然輒垂淚自非至性人曷敢輕相示君復爲我言龍駒
早奄逝卜夏情最傷喪明猶不置我亦抱斯痛聞言心
如割乾坤旣傾覆賢者合憔悴君臣父子間慘烈胡獨
備天道不可知令人發長喟

咏史 庚寅

季主楚大夫義不臣漢皇側身長安市賣卜以自藏宋
賈同車來列坐弟子俯俛首聽其言驚顧不及詳翻爲
長者笑忸怩面無光務華而絕根他日終自傷

炎漢運方隆君平乃高蹈榮祿非所求卜筮從所好與
臣言依忠與子言依孝百錢卽有餘千駟何足道優游
下簾時觀易窮窅奧嗟彼揚子雲美新亦何耗

吾愛管公明弱齡蘊神智學窺爻象先占卜乃餘事吉
凶前民用鮮不詫靈異君言實無心聊以示趨避當時
何鄧流豈不盛權勢高人目爲鬼今古同一喟

史稱郭景純嗜酒復多欲匪不愛其生求死恐不速王
敦謀逆初焚香召君卜正言摧折之引頸受刑戮雖云

金山集
數當盡堅靱不可曲至今游仙詩令人仰芳躅
悲哉謝侍郎生於宋元交慷慨欲致命有母難以拋明
夷垂其翼乃在六二爻何以畢餘生賣卜建陽橋惜不
隱名姓還爲人所要天運可轉移我心終不搖

寄懷明圃子畱

仲夏聞爾病病勢亦孔亟使我心徬徨累日哽不食每
逢故鄉人輒問爾消息人言未分明我心轉回惑江生
是爾親見我淳水北開口問所思爲言有起色客懷久
不懌聽此喜欲狂買酒酌江生一飲遂百觴世事如春
華隨風各颺颺爾獨抱至性古栢纏秋霜又復攻騷雅
寒梅吐孤芳宇內實罕匹豈止桐一鄉平生慕明農自
號爲明圃農圃本同心風期在千古所恨遭亂離不得

聚鄉土窮困旣已嗟况乃疾病苦願爾厚自愛明德永
相輔此意知者誰惟我斷事祖

重至太湖訪李明府漑林先生

有客江上來貽我尺素書借問貽者誰書中復何如李
侯邦家彥二十專城居惠風扇丘園甘澤潤里閭垂念
至遠人言簡意有餘憶昔鄉舉日招我載後車自愧羽
毛短不足當吹噓雖未入網羅懷恩敢忘諸山川日以
遠音問日以疎感君情纏綿芳訊頻及予何以報相思
駕言歸故廬况逢嶽降辰乃在陽月初旣提罍中酒復
採園中蔬祝君壽無疆千載垂令譽

初度書懷

辛卯

子輿悅聖道四十不動心不動與不惑所得誰淺深吾

幼讀其書卽以道自任進修苦不力仍與世浮湛年齒
日已邁憂患日已侵無聞先自愧後輩寧見欽往者不
可諫猶可及來今

昔聞杜陵叟降生乃壬子厥後香山翁生年亦復爾相
去六十載英名千古峙我生幸同庚性情復相似酷嗜
二公詩詩成差可擬杜猶拜拾遺白直躋卿士我老窮
且賤曷由繼芳趾

日月一何速四時更推遷人情競趨時嫵媚者爲賢我
性本迂拙世味復澹然心傷舊人老不愛新人妍所以
甘寂寞深山鉏石田柰何命淹蹇力田不逢年年早
澇并飢餓南山顛

少小負奇氣有力猛如虎偏側不得施中年盡消阻入

室嘗畏人出門焉敢怒衆口肆詆訶吾噤不敢吐天地
旣瘡痍賢人合偃僂運去力難爭殺身亦何取鳳鳥復
來儀軒軒自霞舉

精衛銜木石將以填東海力微願不薄終見桑田改愚
公徙北山子孫期有待山靈畏其誠一夜移千磊匹夫
有至性可以貫真宰况乃忠孝人九死猶未悔世眼多
憎憎此理誰復解

平生好結交獨與貧士宜豈無富貴人恐非夙所期枳
橘不同根地氣浸滛之習俗移本性變化安可知當時
貧賤友古道爭相持及其行富貴素質鮮不虧始終不
虧者惟有松栢姿

憶昔居白門雅游不知數朝登鳳皇臺暮宿桃葉渡是

時天下平四方羣賢聚文酒無虛日青雲樂相附一從
黑風來吹折鍾陵樹髦士遜於荒望斷江東路回首問
南京傷心涕如雨

人情望有子莫不願其才我既有才子中路委塵埃聞
者猶痛惜骨肉能不哀因思古賢豪功業何崔嵬千秋
萬世後子孫安在哉有子麾不去無子招不來有無任
自然肝腸勿崩摧

我生何不幸際茲喪亂辰逢世既寡術避世復無因置
身隱見間所愧箕潁民層霄容逸翮積水藏脩鱗明朝
入山去結廬在河濱耳目絕塵垢煙霞自冬春飲酒還
賦詩可以全吾真

四令君詩

予少狷介耻干謁人卽躬耕亦足自給
故州郡之門絕未履焉崇禎壬午江南

北大荒斗米千錢是歲家人始乏食有友梁平
叔令宣城不得已一往謁之君謝客甚嚴願獨
厚子三月贈金五百有奇自是家人無飢餒憂
矣乙酉之變子避兵吳江一載衣食垂盡不得
已索負於常州判某某不爲禮田益甚適新令
張環生來有稱子姓名者君欣然要人共署厚
餉之未幾宵小進蜚語子辭去而君意尚欲然
也戊子冬病困白下計無所出友人邢孟貞言
其邑令崔正誼數問子蓋往謁之不得已附孟
貞舟至高淳已除夕矣崔聞子至趨駕見枉握
手殷殷道十五年相慕之意明年爲子治裝甚
厚會淳人製屏障爲君壽君屬予文爲子治裝甚
者名直書淮西山人方丈鳴呼此道豈于今人
中求哉先是子遊楚過太湖湖令李泚林一見
如舊懽自是書問不絕庚寅冬子重至湖湖當
兵火凋殘之後頗不能爲膏秣地然爲子招集
生徒廿餘人北而受業修脰不薄由是得徙家
卜居于湖終歲無干人羞者君之力也後宵小
亦進蜚語君不爲動嗟乎環生而外復有環生
矣顧念子性本狷介抑又誕放與世多齟齬不
合而四君皆能諒我于禮法之外一異也梁猶
故交張崔李未謀面乃能知我于易代之後又
救我于極困之時二異也梁遷諫省張轉銓曹
崔李名位將來未可量其遇我厚皆在作令時

三異也辛卯初秋風雨經旬獨臥茅齋撫今追昔不勝知己之感因作四令君詩以識予懷

梁宣城平叔

應奇四川嘉定人庚辰進士

梁公西川彥作令古宣城政教甫期月厥民騰頌聲愛之如慈母畏之若神明訟庭何峻絕賓客莫敢縈獨予鼓枻來辱君倒屣迎下問頗不耻時時枉柴荆交貴白璧賤誼重黃金輕是時南國荒江北復阻兵妻子免溝壑實荷君生成明年入諫省奉使閩粵行既不逢左袵仍聞立勲名相見知何期馳思難爲情

張武進環生

國樞北直景州人庚辰進士

張侯在先朝蔚然公輔器中年丁世變欲隱志不遂疆起授一官見人嘗有愧毘陵下車時我適游其治君聞我在茲汲汲願把臂布衣入官舍放言罔所忌豈但能

優容私語潛下淚贈金累十鎰深衷猶未置小人懷嫉
如歎爾蒙詒許于義不可畱君聞乃大恚後見吾鄉人
諄諄問不置感此高厚情彷彿昨日事

崔高淳正誼

撫奇河南夏邑人丁亥進士

崔侯經國才屈節爲小縣錢穀不足理湖山恣嘉宴嘗
與邢翁游垂問及愚賤神交十五年安得一會面除夕
至河干逡巡未敢見黃昏君在駕旅次驚深眷百金製
一屏其文屬予撰祇愛野夫名公卿非所羨此意真古
人俗眼靡不眩四月子告歸臨別猶戀戀明年復相期
解橐情未倦無以報君恩願效梁間燕

李太湖溉林

世治北直東鹿人丁亥進士

李侯年弱冠玆譽升南宮筮仕得荒邑乃在深山中有

城無居民但見荆棘叢君來勤撫字漸集哀鴻我初
涉其境片言愜深衷形踪雖寡親音書往來通踰年重
過此絃誦聲不同君詔諸俊彥執契求良工予學本嫻
淺謬爲人所崇聚徙城南隅厥社名琴風誓將攜妻子
結茅隱司空永隨田間老咏歌澤無窮

寄陳襄雲

冬夜不能寐所思在潛嶽潛嶽有高人含章隱幽壑風
昔雅相慕兵戈阻城郭雖未覩君顏神交非冥漠有客
自潛來誦詩君所作中有見懷篇古義何沉著一從乾
坤破忠孝人落落卽挺猿狖姿亦飲羊馬酪君獨抱疇
尚窮困我相若所惜未謀面平生欣有托雪後梅花開
旋當具芒屨訪君萬山中言踐鷄黍約新詩更唱和藏

酒共斟酌願結爲弟昆西峰長采藥

籬落

平生客游多在家經理少編籬不知法持錢僱隣老人
山斬楊木已又伐羣篠楊木樹爲椿羣篠爲之繚周防
期慎密勿使過禽鳥畫地成小園旋當嬌腐草明年種
瓜豆藿食亦可飽愧彼山中人還山胡不早